

A toca turno na Gwendy Sneek pa conta storia na nos grandinan



ORANJESTAD - Despues di Sra. Munye Oduber-Winklaar, Gwendy Sneek ta riba programa di contamento di storia e luna aki. Gwendy ta conta entre otro e storia 'Tera firme'. Un fragmento for di e buki 'Tara y e Bient'i mainta' cu e mes a skirbi y e ta declama un poesia di Nydia Ecury for di e obra 'Kantika pa Mama Tera'.

Gwendy Sneek ta participa pa di dos biaha den e proyecto di biblioteca. Gwendy cu entusiasmo ta explora su habilidad artistico den pintamento, skirbimento, contamento y mucho mas. Na 2008 el a publica su obra 'Meimei di shelo y tera', tambe el a tene diferente exposicion di su cuadranan.

Bibliotecarianan di Biblioteca Nacional Aruba hunto cu Gwendy Sneek ta bishitando diferente cas di anciano. Diferente otro presentacion ta planea pa tuma lugar na e diferente cas di Anciano y Cas Marie cu Sr. Marco Christiaans, autor di e buki 'Perseverancia'. Un otro parti di e programa



ta presentacion di sketch. 'Actornan' di biblioteca ta presenta diferente proverbio y dicho den forma di sketch pa e publico y den e forma aki tin interaccion cu e grandinan.

Cada siman ta bishita un cas. E presentacion ta dura mas

o menos un ora. Meta di e proyecto aki ta pa yuda tene e habitantenan di e casnan socialmente activo y pa haci promocion di lesamento. E bunita proyecto aki a bira posibel cu co-financiamiento di UNOCA y Biblioteca Nacional Aruba ta gradici UNOCA pa esaki.

